

02/09/1998

Semangat kontinjen negara membara

Hussain Said

KUNCI semangat yang jelas dicari selama ini dalam kontinjen negara jelas terpancar sepanjang perjalanan dari Universiti Tenaga Nasional (Uniten), Bangi ke Perkampungan Sukan Bukit Jalil semalam.

Konvoi lapan bas dan dua trak tentera sambil laungan lagu rasmi kontinjen `Barisan Kita' jelas bergema di sepanjang perjalanan itu sambil Jalur Gemilang megah berkibar.

Gambaran itu jelas menandakan kontinjen negara tampak bersemangat untuk membuktikan keupayaan seterusnya bersedia menyahut rintangan bakal dihadapi untuk bertarung di gelanggang sendiri.

Terdahulu, simbol simbolik atlit secara rasmi mewakili negara dirasmikan dalam majlis `Sekapur Sireh' dengan penyerahan pakaian rasmi kontinjen serta kad pentauliahan oleh chef-de-mision, Datuk Khalid Yunus.

Dalam majlis itu, Khalid sekali lagi mengingatkan amanat Perdana Menteri, Datuk Seri Dr Mahathir Mohamad kepada atlit mengenai tanggungjawab dan harapan yang perlu mereka pikul.

Malah, Khalid mahukan atlit tidak menimbulkan sebarang masalah yang boleh menjejaskan maruah negara dan mahukan mereka mengutamakan disiplin dalam setiap gerak geri.

Sambil itu, Khalid turut mahukan atlit melupakan segala masalah sepanjang temasya ini dengan menjuruskan tumpuan sepenuhnya untuk memberi persembahan terbaik walaupun berdepan jaguh dunia.

"Pagi ini secara rasmi anda semua menjadi wakil negara dalam temasya ini. Gunakanlah peluang yang diberikan sebaik mungkin dan buktikan keupayaan masing-masing.

"Biarapun tewas, semangat melawan harus dipamerkan. Apa yang penting, saya harap kamu semua berdisiplin dalam setiap gerak geri untuk menjaga maruah negara," katanya.

(END)